

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine na 32. sjednici Predstavničkog doma, održanoj 9. i 14. jula 2008. godine, i na 19. sjednici Doma naroda, održanoj 23. jula 2008. godine, usvojila je

## **ZAKON**

### **O IZMJENAMA I DOPUNAMA ZAKONA O UDRUŽENJIMA I FONDACIJAMA BOSNE I HERCEGOVINE**

#### Član 1.

U Zakonu o udruženjima i fondacijama Bosne i Hercegovine ("Službeni glasnik BiH", br. 32/01 i 42/03) u članu 2. stav 1. mijenja se i glasi:

"1. Udruženje je, u smislu ovog zakona, svaki oblik dobrovoljnog povezivanja tri ili više fizičkih ili pravnih lica, u svim kombinacijama, radi unapređenja i ostvarivanja nekog zajedničkog ili općeg interesa ili cilja, u skladu sa Ustavom i zakonom, a čija osnovna svrha nije sticanje dobiti."

Iza stava 1. dodaju se novi st. 2., 3. i 4. koji glase:

"2. Udruženja mogu osnivati svoje saveze ili druge oblike udruživanja u kojima se njihovi interesi povezuju na višem nivou (udruženja višeg nivoa).

3. Udruženja višeg nivoa uživaju sva prava i slobode garantirane udruženjima.

4. Udruženja i udruženja višeg nivoa imaju pravo slobodno se udruživati te saradivati s međunarodnim organizacijama osnovanim radi unapređenja istih prava i interesa."

U dosadašnjem stavu 2., koji postaje stav 5., riječi: "iz Bosne i Hercegovine" brišu se.

#### Član 2.

U članu 3. u stavu 2. riječi: ", bez obzira gdje su registrirani" zamjenjuju se riječima: ", bez obzira gdje je sjedište subjekta upisa".

Stav 3. briše se.

#### Član 3.

U članu 4. stav 3. briše se.

Dosadašnji st. 4., 5., 6. i 7. postaju st. 3., 4., 5. i 6.

#### Član 4.

Član 5. mijenja se i glasi:

#### "Član 5.

1. Udruženja i fondacije samostalno utvrđuju ciljeve i djelatnosti u skladu sa Ustavom i zakonom.

2. Ciljevi i djelatnosti udruženja ili fondacije ne mogu biti u suprotnosti sa ustavnim poretkom Bosne i Hercegovine, ni usmjereni ka njegovom nasilnom rušenju niti raspirivanju nacionalne, rasne i vjerske mržnje ili diskriminacije zabranjene zakonom.

3. Ciljevi i djelatnosti registriranog udruženja, odnosno fondacije ne mogu uključivati angažiranje u predizbornoj kampanji, prikupljanje sredstava za kandidate ili finansiranje kandidata, odnosno političkih stranaka.

4. Udruženje i fondacija podnose godišnji izvještaj o radu i finansijski izvještaj u skladu sa zakonom, drugim propisima i statutom."

Član 5.

Član 8. mijenja se i glasi:

"Član 8.

1. Udruženje ili fondacija upisuje se u registar udruženja ili registar fondacija koji vodi Ministarstvo pravde Bosne i Hercegovine (u daljnjem tekstu: Ministarstvo).

2. Postupak za registraciju i prestanak rada udruženja i fondacija vodi se po odredbama ovog zakona i Zakona o upravnom postupku."

Član 6.

Član 11. mijenja se i glasi:

"Član 11.

Osnivački akt udruženja sadrži:

- a) imena, prezimena i adrese, odnosno naziv i skraćeni naziv i sjedište osnivača,
- b) naziv, sjedište i adresu udruženja,
- c) osnovne ciljeve osnivanja udruženja,
- d) ime i prezime lica ovlaštenog za obavljanje poslova upisa u registar udruženja,
- e) potpise osnivača ili lica ovlaštenih za zastupanje, te jedinstveni matični broj građana, ukoliko su osnivači državljani Bosne i Hercegovine."

Član 7.

U članu 12. u stavu 1. tačka b) iza riječi "ciljevi" dodaju se riječi: "i djelatnosti".

Iza tačke e) dodaje se nova tačka e1) koja glasi:

"e1) način podnošenja finansijskog izvještaja i izvještaja o radu;"

Član 8.

U članu 14. iza stava 2. dodaje se novi stav 3. koji glasi:

"3. Udruženje može osnovati svoje urede, klubove i druge organizaciono-pravne oblike, u skladu s odredbama statuta."

Član 9.

Član 16. mijenja se i glasi:

"Član 16.

1. Skupština je obavezni organ udruženja.
2. Ako statutom nije drugačije uređeno, skupštinu čine svi članovi udruženja, s jednakim pravom glasa.
3. Statutom udruženja mogu se predvidjeti i drugi organi.
4. Ukoliko statutom nije predviđeno osnivanje upravnog odbora ili drugog organa upravljanja, skupština će imenovati jedno ili više lica koja će zastupati udruženje u pravnom prometu."

Član 10.

U članu 19. u stavu 1. riječi: ", ukoliko ga udruženje ima" zamjenjuju se riječima: "ili lice ovlašteno za zastupanje".

Član 11.

Član 20. briše se.

Član 12.

U članu 23. u stavu 1. tačka a) iza riječi "imena" dodaju se riječi: "i prezimena".

U tački b) iza riječi "postoji," dodaje se riječ "sjedište".

Tačka d) mijenja se i glasi:

"d) iznos novčanih sredstava ili drugih vidova imovine koje osnivač ulaže;"

Iza tačke e) dodaje se nova tačka f) koja glasi:

"f) potpise osnivača, a za državljane Bosne i Hercegovine i jedinstvene matične brojeve."

Član 13.

U članu 24. u stavu 1. tačka b) iza riječi "ciljeve" dodaju se riječi: "i djelatnosti".

Iza tačke d) dodaje se nova tačka d1) koja glasi:

"d1) moguće korisnike sredstava fondacije;"

#### Član 14.

U članu 26. u stavu 4. iza riječi "Upravni" dodaje se riječi "odbor".

U tački a) riječi: "ili priznavanje osnivačkog akta," brišu se.

Iza tačke a) dodaju se nove tač. b) i c) koje glase:

"b) upravljanje imovinom fondacije;

c) imenovanje lica ovlaštenog za zastupanje i predstavljanje fondacije;".

Dosadašnja tačka b) postaje tačka d).

Dosadašnja tačka c) koja postaje tačka e) mijenja se i glasi:

"e) pripremanje finansijskih i drugih izvještaja; i".

Dosadašnja tačka d) postaje tačka f).

#### Član 15.

Član 27. briše se.

#### Član 16.

Član 28. mijenja se i glasi:

#### "Član 28.

1. Podnošenje zahtjeva za registraciju udruženja i fondacija je dobrovoljno. Udruženja i fondacije status pravnog lica stiču danom registracije.
2. Ministarstvo vodi registre udruženja i fondacija, u skladu s odredbama ovog zakona.
3. Registar je otvoren za javnost. Svako lice može lično ili poštom zatražiti kopiju bilo kojeg upisa u registar ili bilo kojeg dokumenta iz spisa, u skladu s odredbama Zakona o slobodi pristupa informacijama u Bosni i Hercegovini.
4. Izuzetno od odredbi stava 3. ovog člana, ovlašteni predstavnik udruženja ili fondacije može zahtijevati od Ministarstva da određeni podaci koji su upisani u registar ne budu dostupni javnosti, ukoliko bi time mogao ugroziti lični integritet osnivača ili članova udruženja ili fondacije. O ovom zahtjevu Ministarstvo odlučuje posebnim rješenjem."

#### Član 17.

Član 29. briše se.

#### Član 18.

U članu 30. stav 2. mijenja se i glasi:

"2. U slučaju da se dva ili više udruženja ili fondacija registriraju sa suštinski istim nazivom ili znakom, Ministarstvo će, po zahtjevu stranke ili po službenoj dužnosti, donijeti rješenje kojim nalaže udruženju ili fondaciji koja je kasnije registrirana da:

- a) u roku od mjesec dana od dana prijema rješenja, podnese zahtjev za promjenu imena ili znaka u registru i
- b) će, ukoliko ne podnese zahtjev u navedenom roku, biti brisana iz registra udruženja ili fondacija."

Iza stava 2. dodaju se novi st. 3., 4., 5. i 6. koji glase:

- "3. Rješenje iz stava 2. ovog člana dostavlja se zainteresiranim stranama.
4. Protiv rješenja iz stava 2. ovog člana ne može se izjaviti žalba, ali se može pokrenuti upravni spor.
5. Ukoliko udruženje ili fondacija ne postupi po nalogu iz rješenja iz stava 2. ovog člana, Ministarstvo će donijeti rješenje o brisanju iz registra udruženja ili fondacije.
6. Protiv rješenja iz stava 5. ovog člana ne može se izjaviti žalba, ali se može pokrenuti upravni spor."

#### Član 19.

U članu 34. u stavu 1. riječi: "petnaest dana" zamjenjuju se riječima: "30 dana".

U stavu 2. iza riječi "ciljevi" dodaju se riječi: "i djelatnosti", a riječi: "člana 3. tačka 3. ovog zakona odnosno" brišu se.

Stav 3. briše se.

#### Član 20.

U članu 35. stav 1. mijenja se i glasi:

- "1. Protiv rješenja Ministarstva može se izjaviti žalba nadležnom drugostepenom organu."

#### Član 21.

Član 43. mijenja se i glasi:

#### "Član 43.

1. Udruženja i fondacije dužni su Ministarstvu podnijeti prijavu o svakoj promjeni činjenica koje se upisuju u registar, u roku od 30 dana od dana izvršene promjene.
2. Ministarstvo će donijeti rješenje o dozvoli promjena činjenica koje se upisuju u registar u skladu s odredbama člana 32. ovog zakona."

#### Član 22.

Član 45. mijenja se i glasi:

#### "Član 45.

1. Odredbe zakona o registraciji udruženja i fondacija primjenjuju se i na registraciju ureda, predstavništava ili drugog organizacionog oblika stranog ili međunarodnog udruženja ili fondacije, ili druge međunarodne organizacije, ukoliko zakonom nije drugačije propisano (u daljnjem tekstu: strane nevladine organizacije).
2. Uz zahtjev za upis u registar prilaže se:
  - a) dokaz o upisu strane nevladine organizacije u registar domicilne zemlje;
  - b) akt o otvaranju ureda, predstavništva ili drugog organizacionog oblika u Bosni i Hercegovini;
  - c) ime i adresa lica ovlaštenog za zastupanje nevladine organizacije u Bosni i Hercegovini (ovjerena kopija isprave o identitetu lica ovlaštenog za zastupanje);
  - d) sjedište i adresa ureda u Bosni i Hercegovini.
3. Ako prema zakonu domicilne zemlje strane nevladine organizacije nije propisan upis udruženja u registar, umjesto rješenja o registraciji u domicilnoj zemlji, uz zahtjev za upis, podnosi se druga pismena isprava, ovjerena od nadležnog organa, kojom se dokazuje da organizacija ima status pravnog lica u domicilnoj zemlji.
4. Ukoliko rješenje o upisu u registar u domicilnoj zemlji ne sadrži podatke o statutarnim ciljevima i djelatnostima udruženja, uz zahtjev za upis u registar podnosi se i statut ili neki drugi unutrašnji akt iz kojeg su vidljivi ciljevi strane nevladine organizacije."

#### Član 23.

U članu 47. stav 1. riječi: "ovim i drugim relevantnim zakonima" zamjenjuju se riječju "zakonom".

Iza stava 2. dodaje se novi stav 3. koji glasi:

"3. Nadzor nad zakonitošću i namjenskim korištenjem i raspolaganjem sredstvima udruženja i fondacije vrši ovlašteni organ udruženja, odnosno fondacije, određen statutom i ovim zakonom, kao i nadležni organi."

#### Član 24.

Član 51. mijenja se i glasi:

#### "Član 51.

Udruženja i fondacije brišu se iz registra kada rješenje o prestanku rada udruženja odnosno fondacije koje donese Ministarstvo postane konačno ili kad Sud Bosne i Hercegovine donese pravosnažnu presudu o zabrani rada udruženja ili fondacije."

#### Član 25.

Iza člana 51. dodaju se novi čl. 51a., 51b. i 51c. koji glase:

#### "Član 51a.

1. Udruženje ili fondacija prestaje raditi ako:
  - a) nadležni organ udruženja, odnosno fondacije donese odluku o prestanku rada ili odluku o pripajanju, razdvajanju ili transformaciji udruženja odnosno fondacije;
  - b) se utvrdi da je udruženje ili fondacija prestala djelovati.
2. Smatrat će se da je udruženje prestalo djelovati ako:
  - a) je proteklo dvostruko više vremena od vremena utvrđenog statutom udruženja za održavanje skupštine, a skupština udruženja nije održana;
  - b) se broj članova udruženja smanji ispod broja tri.
3. Kada Ministarstvo utvrdi činjenice iz st. 1. i 2. ovog člana, donosi rješenje o prestanku rada udruženja, odnosno fondacije.

#### Član 51b.

1. Udruženju, odnosno fondaciji zabranit će se rad ako:
  - a) djeluje suprotno odredbama člana 5. st. 2. i 3. ovog zakona;
  - b) nakon prekršajnog kažnjavanja u povratu (član 53. ovog zakona) nastavi da obavlja djelatnosti koje nisu u skladu sa statutarnim ciljevima udruženja ili fondacije;
  - c) nakon prekršajnog kažnjavanja u povratu (član 53. ovog zakona) nastavi da djeluje suprotno odredbama ovog zakona;
  - d) su ispunjeni uslovi iz člana 30. stav 5. ovog zakona.
2. Postupak za zabranu rada udruženja odnosno fondacije pred Sudom Bosne i Hercegovine pokreće Ministarstvo, kao i drugi organi nadležni za kontrolu rada udruženja i fondacija.

#### Član 51c.

1. Presudu o zabrani rada udruženja, odnosno fondacije donosi Sud Bosne i Hercegovine.
2. Presudom kojom se izriče zabrana rada udruženja, odnosno fondacije odredit će se mjere u pogledu imovine, kao i druge neophodne mjere.
3. U postupku o zabrani rada udruženja, odnosno fondacije, pokrenutog na osnovu člana 5. stav 2. ovog zakona, shodno se primjenjuju odredbe Zakona kojim je uređen krivični postupak."

#### Član 26.

Član 53. mijenja se i glasi:

"Član 53.

1. Kaznom u iznosu od 300,00 KM do 3.000,00 KM kaznit će se zbog prekršaja udruženje ili fondacija koja:

- a) obavlja djelatnosti koje nisu u skladu s ciljevima i djelatnostima udruženja ili fondacije,
- b) u pravnom prometu ne upotrebljava naziv pod kojim je upisan u registar,
- c) ne prijavi promjene podataka koji se upisuju u registar u roku od 30 dana od dana nastupanja ove promjene,
- d) ne upotrijebi višak prihoda nad rashodima ostvarenog obavljanjem privredne djelatnosti na način predviđen zakonom i statutom.

2. Kaznom u iznosu od 100,00 KM do 1.000,00 KM za prekršaj iz stava 1. ovog člana kaznit će se i odgovorno lice u udruženju ili fondaciji."

Član 27.

Član 56. mijenja se i glasi:

"Član 56.

1. Pravilnik o načinu vođenja registra udruženja i fondacija Bosne i Hercegovine i stranih međunarodnih udruženja i fondacija i drugih neprofitnih organizacija bit će usklađen s odredbama ovog zakona, u roku od 60 dana od dana stupanja na snagu ovog zakona, i bit će objavljen u "Službenom glasniku BiH".

2. Pravilnikom će biti propisan oblik i sadržaj obrasca registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija, način upisa i vođenja registra, način podnošenja i obrazac zahtjeva za upis promjena u registru, način vođenja zbirke isprava, čuvanja registra, izdavanja izvoda iz registra, kao i druga pitanja značajna za upis i vođenje registra."

Član 28.

Ovaj zakon stupa na snagu osmog dana od dana objavljivanja u "Službenom glasniku BiH".

---

PSBiH broj 231/08  
23. jula 2008. godine  
Sarajevo

---

Predsjedavajući  
Predstavničkog doma  
Parlamentarne skupštine BiH  
**Niko Lozančić**, s. r.

---



Predsjedavajući  
Doma naroda  
Parlamentarne skupštine BiH  
dr. **Mladen Ivanić**, s. r.